



UKgothatso Montjane, iNdlovukazi yeTenese

Glanice Masilo
Sibusiso Khumalo



Indatjana esencwadini le ikhuluma
ngoKgothatso Montjane.

Wabelethwa ngomnyaka we-1986 ePolokwane,
edorojaneni elibizwa ngokuthiwa yi-Seshego.

Umntazanyana lo wabelethwa anobulwele
obarholophaza izandla neenyawo zakhe.

Ekukhuleni kwakhe wakhula waba
yikwekwezana yetenese eyaduma ephasini
mazombe!



Ubulwele bakhe babangela bona abodorhoda
bamqunte inyawo ngehla kwedolo. Sekasebenzisa
inyawo leplastiki.

Abanye abantwana bebangafuni ukudlala naye
ngesimanga sokuba nokukhubazeka kwakhe.

Unina yena akhange ambandlulule bekamthatha
njengomntwanakhe. Bekamnikela nemisetjenzana
yangendlini efana nokuthi ahlanze izitja.



Unina kaKgothatso wamthatha wamusa esikolweni i-*Helen Franz Special Needs School*. Lesi sikolo sabantwana abanokukhubazeka.

Kulapha afika watjengisa ukuba nesiphiwo sezemidlalo.


Esikolweni, wafika wangenela umdanso we*Ballroom* nomdanso we-*Latin American*.



Omunye wabotitjhere bakaKgothatso wamkhetha ukobana ayokujamela isikolo sabo ekampeni yetenese e-Johannesburg.

UKgothatso wabe angakhange ayidlale itenese!

UKgothatso wathi, "Kufanele ngiyidlale ngombana ngafundiswa bonyana ngibahloniphe abantu abadala."



UKgothatso wadlala kuhle khulu ekampeni yetenese. Lokhu kwaba kuthoma kwekhambo lakhe lokuba mdlali ophambili wetenese okhamba ngesitulo samavilo eentjhabatjhabeni.

Waphiwa umnikelo wesitulo samavilo kanye neentlabagelo zokudlala itenese.

Bekasendleleni yokuba ngomunye umSewula Afrika ophezulu emdlalweni wabanokukhubazeka.



UKgothatso wathoma ngokungenela amaphaliswano wetenese yalabo abadlala bahlezi esitulweni samavilo ephasini mazombe.

Wathumba amaphaliswano e-Belgium neSwitzerland. Iphaliswano letenese ye-Swiss kwabe kuliphaliswano ebekalithanda tle!

ESewula Afrika watlonyeliswa kathathu njengomma waloyo mnyaka onokukhubazeka kwezemidlalo.



Ngomnyaka we-2013 newe-2014, uKgothatso wangenela amaphaliswano alilungelunge wetenese e-Australia, eFrance ne-America.

Wadlala itenese yabadlala ngamunye, njengomdlali oyedwa. Wadlala netenese yabadlala ngababili, okumdlalo odlalwa babantu ababili ngapha nangapha.



Okhunye godu uKgothatso wangenela iphaliswano lemiDlalo yama-Olimphiki wabaNokukhubazeka angenelwa babantu abadlala zemidlalo abanokukhubazeka.


Ukuzibandulela amaphaliswano la kwakubudisi tle, kodwana uKgothatso akhange aphelelwe mamandla.

Nanje usaphalisana eenqhemeni zama-oliMphiki wabaNokukhubazeka eSewula Afrika.




UKgothatso wasebenza ngamandla neemfundweni zakhe. Wafunda eYunivesithi yeVenda lapha afike wafundela ukuba neziqo kwezokuZithabisa nakuSayensi yezemiDlalo.

Eyunivesithi, umdlalo wetenese yabakhamba ngeentulo zamavilo kwakungiwu kwaphela umdlalo owawukhona wabantu abanokukhubazeka.



I*Wimbledon* ise- England. Lapho kulapho amaphaliswano amanengi adumileko wakade wetenese abe abanjelwa khona qobe mnyaka.

Ngomnyaka we-2018, uKgothatso waba ngumma wokuthoma onzima weSewula Afrika ukwamukelwa emidlalweni yeenkutani e*Wimbledon*.



Kwafuneka bona uKgothatso akhambe aye e-England ayokungenela iphaliswano lomdlalo elimlandelane le *Wimbledon*.

Kodwana kwakunganamali yokumbhadalela isiphaphamtjhini neendawo zamalalo.

UKgothatso wakhathazeka khulu ngombana wabe angeze akghone ukukhamba ngebanga lokutlhoga iimali.

Ngetjhu, wathola isizo esiqhemeni sabomma abanamahwebo!



IWimbledon yabe iyithonamende yesine ye *Grand Slam* uKgothatso ayingenelako ngomnyaka we-2018.

Ama *Grand Slams* maphaliswano wetenese amakhulu begodu aqakathekileko eentjhabatjhabeni.

Waba mAfrika wokuthoma ohlezi esitulweni samavilo odlala itenese ukuphalisana emidlalweni emilandelande emine ye- *Grand Slam* ngomnyaka owodwa.



UKgothatso umdlali wetenese ohlezi esitulweni samavilo okhamba phambili e-Sewula Afrika ne-Afrika yokana. Ungomunye wabادلالي betenese abahlanu abasezingeni eliphezulu ephasini mazombe!

Ukwengeza epumelelwanakhe, uKgothatso usiza ngokusekela abanye abadlali abanokukhubazeka.

Utjengisa abantu bona nawumumuntu ungaba yinanyana yini ofuna ukuba ngiyo, nalokha unokukhubazeka.

—Imibuzo

1. Ngubani uKgothatso Montjane? Hlathulula.
2. Kweza njani bona uKgothatso athome ukudlala itenese?
3. Yini ibizo lesikolo sakaKgothatso, lapha afunda khona umdanso we*Ballroom* newe *Latin American*?
4. Waphalisana nini uKgothatso emidlalweni emilandelane emine yama-*Grand Slam*? Kubayini lokhu kuqakathekile?

Indatjana esencwadini le yabunjwa begodu yatlolwa ngelimi leSetswana, njengengcenyeyephrojekthi yamamatheriyali wokufunda we-Zenex Ulwazi Lwethu we-2021.



Ulwazi Lwethu is a Zenex Foundation funded and initiated project to develop a series of graded and leisure African language readers and teacher support materials. This project is targeted at teaching and supporting learners in the Foundation Phase to improve their home language reading and understanding. The readers have been originated in nine African languages in collaboration with Molteno Institute for Language and Literacies, Nelson Mandela Institute for Education and Rural Development, Room to Read South Africa, and Saide. All resources are developed as Open Education Resources (OER).



NELSON MANDELA
INSTITUTE FOR
EDUCATION AND
RURAL DEVELOPMENT



World Change Starts with Educated Children®

Your attribution should include the following:

Title: UKgothatso Montjane, iNdlovukazi yeTenese

Author/s: Glanice Masilo

Translator/s: Sponono Mahlangu


Illustrator/s: Sibusiso Khumalo

Assurer/s: William Jiyana

Language: isiNdebele

© Zenex Foundation - Saide 2023

CC BY includes the following elements:

BY  - Credit must be given to the creator

